


CONSTITUTIONES

ORDINIS CISTERCIENSIVM REFORMATIVM

BEATÆ MARIE VIRGINIS DE TRAPPA.


A SANCTA SEDE

APPROBATÆ ET CONFIRMATÆ.



EX TYPOGRAPHIA

ORDINIS CISTERCIENSIVM REFORMATIVM B. M. V. DE TRAPPA,
IN WESTMALLE.



DECLARATIO PRÆVIA.

Ordo noster, Deo favente et SS. D. N. LEONE PP. XIII. auspice, e monasteriis Cisterciensibus quæ tres Congregationes Beatæ Mariæ de Trappa efformabant, in unum conglutinatis, perfectus est. Vocem enim Supremi Ecclesiæ Pastoris nos vocantis nominatim cum audissemus, Ejus votis obtemperare et unum ovile fieri festinavimus. Quod, Eodem Maximo Pontifice auctorante, per Litteras in forma Brevis die 17 Martii anni 1893 datas, sancitum est.

Nomen inde accepimus: *Ordo Cisterciensium Reformatorum Beatæ Mariæ Virginis de Trappa.*

Majorum nostrorum, Cistercii scilicet priscorum Patrum vestigiis ingredientes, Beatissimæ Virgini Mariæ nos mancipatos esse profitemur; Sanctæ Apostolicæ Sedi reverentiæ, gratitudinis et obedientiæ debitum certatim impendimus, et, per viam contemplationis et pœnitentiæ, spiritualis vitæ perfectionem æmulamur.

Fontes e quibus has Constitutiones hausimus sunt: 1^o Regula Sancti Benedicti; 2^o Carta Caritatis; 3^o Usus et Antiquæ Definitiones Ordinis Cisterciensis; 4^o Litteræ et Constitutiones Apostolicæ.

In omnibus vero quæ per Jus Canonicum aut per præsentis Constitutiones non immutantur, sicut in his quæ ad praxim virtutum spectant, omnes Magistrum sequantur Sancti Benedicti Regulam, neque ab ea temere devietur a quoquam.

CONSTITUTIONES
ORDINIS CISTERCIENSII REFORMATO-
RUM
BEATÆ MARIE VIRGINIS DE TRAPPA.
A SANCTA SEDE
APPROBATÆ ET CONFIRMATÆ.

PARS PRIMA.

DE REGIMINE ORDINIS.

CAPUT I.

DE CAPITULO GENERALI.

- I. Summa Ordinis potestas est penes Capitulum Generale. Idem extremo iudicio statuit de causis mere regularibus ad ipsum delatis. Integrum vero est cuique ut ad Sanctam Sedem provocet.
- II. Capituli Generalis hæc sunt :
- 1° Abbatem Generalem et Definidores eligere eorumque administrationem officii observare ;
 - 2° Abbatis Generalis aut Abbatum Priorumve Titularium abdicationem muneris recipere, aut eos, si opus sit, ab officio movere ;
 - 3° Novarum Communitatum statuendarum, item vendendi, alienandi, mutuandi, e Sacrorum Canonum præscripto, potestatem facere ;
 - 4° Leges et Sanctæ Regulæ et Constitutionibus consentaneas condere ;
 - 5° Judicare, punire sodales legum violatores ;
 - 6° Abusus in relationibus Visitorum notatos abolere.
- III. Capitulum Generale rite quotannis convenit die et loco a Capitulo superioris anni præfinitis.
- IV. Abbates munere fungentes, Priores Titulares et Præpositi Domorum, omni postposita occasione, ad Capitulum Generale convenient, illis solis exceptis

quos corporis infirmitas retinuerit, aut qui in remotioribus partibus habitantes eo termino venerint qui eis fuerit a Capitulo constitutus.

- V. Capitulum Generale quinto quoque anno Plenarium celebretur in quo, ante omnia, vocales Præpositi Domorum fidem exhibere teneantur de onerum Missarum adimplemento ad tramites Constitutionis Innocentii XII. incipientis: *Nuper.*
- VI. Procurator Generalis et Definitores intersunt Capitulo generali, at sine jure suffragii deliberativi.
- VII. Abbas Generalis Generali Capitulo nativo jure præest.
- VIII. In Capitulo quisque ex Ordine sedet ut sua cujusque Ecclesia præstat. Itaque Abbates primum, dein Priores Titulares, tum reliqui. Definitores et Procurator Generalis infimo loco sedent, hic tamen supra illos. Verum si quis Definitor Abbas fuerit emeritus, ante Procuratorem sedeat.
- IX. Ut qua de re in Capitulo decernatur, ipse major suffragiorum numerus sufficit; at ad canonicam depositionem vel Abbatis, vel Prioris Titularis, binæ tertiæ suffragiorum requiruntur partes.
- X. Quandocumque unus aliquis e Capitulo id postulet, suffragiorum latio fit secreto.
- XI. Tam in Capitulo quam in Definitorio, Abbas Generalis duplicis suffragii ferendi jus habet.
- XII. Dum Pater Visitator rationem reddit Visitationis regularis quam in aliquo monasterio peregerit, Superior hujusce monasterii sit præsens; sed si forte Capitulum Generale velit aliquid decernere aut sententiam ferre de eo, egrediatur e Conclavi Capitulari: idem præstet quisquis apud Capitulum speciatim est in causa.
- XIII. Quisque humiliter pœnam subeat et sustineat quam ei forte Capitulum Generale irrogaverit.

- XIV. Si aliqua Ecclesia pauperiem intolerabilem incurrit, Abbas illius cœnobii coram omni Capitulo hanc causam intimare studeat. Tunc singuli Abbates maximo caritatis igne succensi, illius Ecclesiæ penuriam, rebus a Deo sibi collatis, prout habuerint, sustentare festinent.

CAPUT II.

DE ABBATE GENERALI.

- XV. Præter Generalis Capituli potestatem, oportet supremum aliquem esse in Ordine Moderatorem qui perpetuo tueatur Observantiam Institutorum et difficultates expediat quæ ad totum Ordinem spectant. Hujusmodi autem potestatem obtinet Abbas Generalis suo Consilio adjutus.
- XVI. Legum proprii nominis ferendarum jus non habet. Neque de bonis, neque de personis Communitatum statuere potest, sed tantum quædam ad tempus decernere, ubi necessitas id postulet.
- XVII. Negotia quorum expeditio ad Capitulum Generale pertineat ad ipsum differet, si commode id fieri possit.
- XVIII. De cæteris Abbas Generalis agat cum Consilio suo. At, si suffragia adhibentur, minime ipse tenetur sententias plurium sequi, nisi in casibus N° XXXII notatis.
- XIX. Generali Capitulo rationem reddere tenetur administrationis suæ.
- XX. Ad Abbatem Generalem spectat jus confirmandi omnium Superiorum Titularium electiones.
- XXI. Abbas Generalis per se, vel per alium ab ipso delegatum :
- 1° Potest visitare omnia monasteria Ordinis, ea etiam quæ Pater-Immediatus eodem anno visiterit ;
- 2° Item, quotannis visitat eas Domos quæ Domum Matrem non habent, vel ab ea non pendent.

- XXII. Confessiones excipere potest alumnorum Ordinis qui id sponte petierint, ac servato Decreto Clementis VIII, juxta articulum LXXXVIII.
- XXIII. Quisque ex Ordine liberum cum ipso epistolarum commercium habeat.
- XXIV. Abbati Generali pœnas inferenti, si quis forte in utram partem peccaverit, debetur obedientia, non secus ac Generali ipsi Capitulo.
- XXV. Abbas Generalis in suo munere est perpetuus. Residet in Alma Urbe cum Procuratore Generali et Definitoribus.
- XXVI. Eligitur e gremio Ordinis, et in Generali Capitulo Plenario renunciatur ab omnibus Superioribus communitatum præsentibus. Pro electo habebitur is quem major pars suffragiorum, id est numerus medietate major, nominaverit.
- XXVII. Summi Pontificis est electionem Abbatis Generalis ratam habere.
- XXVIII. Capitulum Generale quotannis designabit unum ex Abbatibus qui, eveniente decessu Abbatis Generalis, Ordinem moderetur. Is, infra tres menses Capitulum indicet Plenarium in quo, ipso Præsidente, novus Abbas Generalis renunciabitur. Præsides erit etiam Capituli, defectu Abbatis Generalis.

CAPUT III.

DE DEFINITORIBUS.

- XXIX. Consilium quod Abbati Generali adsidet Definitores quinque constituunt: nimirum duo Gallicæ linguæ, tertius Germanicæ, quartus Anglicæ, quintus Neerlandicæ; eliguntur a Patribus Capitalaribus ad quinquennium.
- XXX. Minime oportet ut Definitores sint Abbates. Debent tamen esse sacerdotes, solemniter professi nec trigesimo anno minores.

- XXXI. Ab Ordine apud Abbatem Generalem constituuntur ut ejus gestionem adjuvent. Quare libere profiteantur oportet in Consilio quid censeant.
- XXXII. Definitorum jus deliberativi suffragii habent: 1° In demissione alicujus e Definitoribus et electione successoris; 2° In approbatione Fundationis novæ; 3° In permissione danda venditionum, alienationum, mutationum, secundum Sacrorum Canonum præscripta; 4° In convocazione extraordinaria Capituli Generalis; 5° In acceptanda renuntiatione Abbatis vel Prioris Titularis, aut in danda facultate ad eorum canonicam depositionem, modo hæc negotia non possint differri usque ad tempus Capituli Generalis, cui speciali modo reservantur.
- XXXIII. Definitorum, nisi Abbates sint, non possunt ad faciendam Visitationem regularem mitti.
- XXXIV. Liberum epistolarum commercium de negotiis Ordinis cum Superiore uniuscujusque Domus habeant.

CAPUT IV.

DE PROCURATORE GENERALI.

- XXXV. Unus ex quinque Definitoribus nomen et munus nanciscitur Procuratoris Generalis. Eligitur a Generali Capitulo.
- XXXVI. Is, sub mandato Generalis Abbatis ejusque consilii Definitorum, est natus negotiorum Ordinis gestor apud Sanctam Sedem.
- XXXVII. Certiorem facit Abbatem Generalem ejusque Consilium de negotiis sibi commissis; jussa et consilia ejus capit, eique suæ gestionis rationem reddit.
- XXXVIII. Nullam pro quovis nostri Ordinis alumno facultatem postulat a Sacris Congregationibus, nisi

preces approbaverit Abbas Generalis aut saltem Superior ipsius rogitantis.

XXXIX. Omnia Decreta a Sacris Congregationibus emanata quæ ad Regulares vel Sacros Ritus spectant, in apposito libro transcribit, et in notitiam Abbatum tradit.

XL. Procurator Generalis diligenter notat sumptus in commodum Ordinis factos, et unaquaque Communitas in partem impensæ veniet.

CAPUT V.

DE PATRIBUS IMMEDIATIS.

XLI. Communitates Ordinis non ratione Provinciarum, sed ex veteri Instituto dividuntur in Domos-Matres et Filias. Abbates Domorum Matrum Patres-Immediati vocantur.

XLII. Hæc Pater-Immediatus præstat :

- 1^o Visitationem regularem Domorum suæ Filiationis per se, vel per Abbatem ab ipso delegatum, quotannis peragit, salvo jure Abbatis Generalis ;
- 2^o Curam habet Domus-Filiæ Abbate vel Priore titulari destitutæ ;
- 3^o Electioni novi Abbatis vel Prioris Titularis jure nativo præest ;
- 4^o Novæ Foundationis Superiorem designat et administrationem retinet, donec Abbas vel Prior Titularis in ea electus fuerit ;
- 5^o Confessiones audire potest personarum regularium sponte id petentium in Domibus Filiationis suæ ;
- 6^o Liberum epistolarum commercium habet cum omnibus alumnis uniuscujusque Domus-Filiæ.

CAPUT VI.

DE ABBATE VEL PRIORE TITULARI

XLIII. Superior titularis, Abbas vel Prior, spiritualem ju-

risdictionem et temporalem administrationem monasterii exercet.

- XLIV. Is munia communitatis confert vel aufert, prout expedire censeat.
- XLV. In rebus majoris momenti et in causis a Sacris Canonibus indictis, sententiam Conventum rogat.
- XLVI. Licet juxta Regulam possit Abbas post auditum Consilium fratrum quod utilius judicaverit facere, res tamen pendeat ex majori parte suffragiorum Capituli conventualis quoties agitur :
- 1° de bonorum emptione, vel permutatione ;
 - 2° de mutuo contrahendo, si decem millia francorum attingat ;
 - 3° de ædificii constructione, demolitione aut restauratione et alia qualibet impensa extraordinaria et notabili, id est quæ decem millia francorum superaret ;
 - 4° de negotiatione artificiali aggredienda.
- In his casibus obtineatur etiam Capituli Generalis beneplacitum, et serventur Constitutiones et Decreta Sanctæ Sedis.
- 5° de litibus movendis vel componendis ;
 - 6° de deleganda alicui gravis negotii procuracione ;
 - 7° de novitio ad professionem admittendo.
- XLVII. Vocales in Capitulo sunt Choristæ omnes in monasterio stabilitate firmati, etiam simpliciter professi, qui sint in Sacris constituti.
- XLVIII. Suffragia non requirantur nisi proposita prius re deliberanda. Abbas duplicis suffragii jure potitur.
- XLIX. Scrutinio peracto, Abbas cum Priore et Subpriore diribeat suffragia. Postea publice annuntiet numerum suffragiorum favorabilium, et consequenter rem acceptatam esse vel rejectam. Si autem agatur de admittendo novitio ad professionem, paritas suffragiorum pro negativa habebitur.
- L. Quod decretum fuerit statim in libro Actuum Capituli referatur, subscribendum ab Abbate cum duobus vel tribus officialibus monasterii.

- LI. Pro minoribus rebus tractandis habeat Abbas consilium particulare : hoc saltem tribus religiosis munere fungentibus constabit.
- LII. Sumptuariæ rationes Domus diligenter sunt curandæ et Visitatori exhibendæ.
- LIII. Ut Superior abesse possit a sede decem dies aut amplius usque ad viginti, id admoneat Patrem Immediatum; ut amplius viginti, permissum petat a Generali Abbate.
-

CAPUT VII.

DE VISITATIONE REGULARI.

- LIV. Singula ordinis monasteria singulis annis visitari debent.
- LV. Quatuor Patres quorum Ecclesia est antiquior, scilicet: Abbas Trappæ Majoris, Westmallensis, Mellearensis et Portus-Salutis locum obtinent quatuor primorum Patrum Cisterciensium in adjunctis præscriptis in Carta Caritatis. Itaque saltem bini Visitationem regularem facient Abbatia Generalitæ, quæ principatum honoris et dignitatis in Ordine habebit.
- LVI. Cætera monasteria Visitatorem habeant Patrem Immediatum, nisi prius Abbas Generalis ea visitaverit.
- LVII. Ex recta ratione conficiendæ Visitationis pendet maxime conservatio regularis disciplinæ. Idcirco Visitatores se obligatos sciant sequi præscriptiones Cartæ Caritatis et Capituli Generalis, necnon et Statutum de Forma Visitationis.
- LVIII. Visitatores, peracta Visitatione, accuratam relationem ad Abbatem Generalem intra duos menses mittant.
-

CAPUT VIII.

DE ELECTIONIBUS ABBATUM.

- LIX. Si qua Domus Ordinis nostri Abbate proprio fuerit destituta, Major Abbas de cujus Domus illa

-
- exivit omnem curam habeat ordinationis illius, donec in ea Abbas alius eligatur.
- LX. Terminus ad electionem assignandus debet ad minus esse quindecim dierum; ad summum autem, justo impedimento cessante, trium mensium.
- LXI. Præfixa et nominata die electionis, convocentur omnes de jure electores, scilicet Abbates quorum Domus ex Abbatia vacante exierunt, et omnes monachi ejusdem cœnobii professi etiam votorum simplicium, qui impedimento canonico non detinentur et sunt in Sacris constituti.
- LXII. Absentes non possunt per litteras suffragium mittere, neque procuratorem ad eligendum constituere.
- LXIII. Quoad modum et formam electionis, serventur Sacrosancti Concilii Tridentini Decreta, necnon Ritualis Cisterciensis præscripta. Qui Ritualis liber ex hoc a S. Sede approbatus minime intelligatur.
- LXIV. Valide agnoscat electus is cui major pars votorum, id est plus dimidia omnium pars, suffragaverit.
- LXV. In electo requiritur ætas sin minus annorum triginta quinque, et ut sit Ordinis nostri solemniter professus.
- LXVI. Licet cuique Matri Ecclesiæ non solum de monachis filiarum suarum Ecclesiarum, sed de ipsis quoque Abbatibus earum libere sibi, si necesse fuerit, assumere Abbatem.
- LXVII. Acta electionis Abbati Generali quamprimum transmittantur pro obtinenda confirmatione.
- LXVIII. Eodem ritu quo Abbates, eligantur Priores Titulares.
-

CAPUT IX.

DE NOVI MONASTERII FUNDATIONE.

- LXIX. Novæ Domus sine expressa et prævia Sacræ Congregationis Episcoporum et Regularium licentia

fundari et erigi non poterunt. Quam licentiam nullus, nisi Capitulo Generali assentiente, petere præsumat.

- LXX. Quantum fieri poterit, nulla nostra construenda sunt cœnobia in civitatibus aut vicis, sed in locis a conversatione hominum semotis.
- LXXI. Juxta Majorum nostrorum præscripta, duodecim saltem personæ cum Præsidente ad novum cœnobi-um instituendum mittantur; nec tamen illuc destinentur, donec locus domibus, libris et necessariis etiam temporalibus ita aptetur, ut vivere et Regulam ibidem valeant observare.
- LXXII. Omnes Ecclesiæ nostræ in memoriam Beatissimæ Virginis Mariæ, cœli et terræ Reginæ, fundentur ac dedicentur.



PARS SECUNDA.
DE OBSERVANTIIS.

CAPUT I.

DE UNIFORMI OBSERVANTIA.

- LXXIII. Uniformis Institutorum observantia retineatur quam ipsa Ordinis nostri natura vult. Itaque, in actibus nostris nulla sit discordia, sed una caritate, una Regula similibusque vivamus moribus.
- LXXIV. In monasteriis ubi paupertas aut loci necessitas exoptulat ut exercitia regularia in aliquo varientur, id non fiat nisi de Capituli Generalis expressa licentia.
- LXXV. Quæ de labore manuum, de jejuniis, vigiliis et abstinentiis hic constituuntur, ea Præsides monasteriorum moderari poterunt et mitigare, pro his monachis quos ob ætatem aut valetudinem, aut aliam justam causam, aliqua indulgentia dignos æstimaverint.

CAPUT II.

DE DIVINIS OFFICIIS.

- LXXVI. Pareant omnes nostri Decreto C. S. R. diei 20 Aprilis 1822, necnon Litteris Apostolicis a SS. D. N. Pio PP. IX. die 7 Februarii anni 1871 datis, super Breviario, Missali, Rituali et Martyrologio quibus uti debemus, et quoties de Officiis pontificalibus agitur, servetur Cærimoniale Episcoporum.
- LXXVII. Officium divinum in choro, horis competentibus, quotidie persolvatur. Nec paucitas monachorum, neque necessitas quælibet laboris ab hac obligatione unquam excuset.

- LXXVIII. Officium etiam Beatæ Mariæ Virginis in ecclesia recitetur diu noctuque, juxta Rubricam et modum in Breviario Cisterciensi ordinatum et dispositum. Qui vero ex causa divinis Horis in ecclesia interesse non possunt, privatim illud persolvant. Hoc servetur etiam quoad Officium Defunctorum diebus a Rubrica præscriptis.
- LXXIX. Cunctis anni diebus, nisi in Rituali aliter notetur, Officium canonicum persolvatur cum cantu Gregoriano, exceptis Nocturnis et Laudibus quæ tantum Dominicis et diebus solemnioribus cantantur.
- LXXX. Missa conventualis cui omnes interesse debent, singulis diebus post Tertiam vel Nonam, juxta Rubricas, cum cantu celebretur.
- LXXXI. In monasteriis ubi numerus monachorum est inferior, Patris Visitatoris sit, de consilio Abbatis localis, determinare num cantus Missæ vel quarumdam Horarum canonicarum omitti debeat.
- LXXXII. Nullus omnino a servitio chori censeatur immunis, nisi pro tempore quo quis necessario in proprii officii munere actu fuerit occupatus. De cætero, omnes veniam a Superiore petere, ipsique absentia causam declarare debent.

CAPUT III.

DE ORATIONE MENTALI.

- LXXXIII. Bis in die, nempe mane post Laudes Officii Beatæ Mariæ Virginis, per semihoram, et sero ante cœnam vel collationem, per quadrantem, omnes orationi mentali in choro vacent.
- LXXXIV. Monet nos insuper Sanctus Pater Benedictus ut orationi frequenter incumbamus. Ideo, extra exercitia communia, unicuique liceat orare, si ad id ex affectu inspirationis divinæ gratiæ trahatur.

-
- LXXXV. Quotidie ante prandium, et post Completorium, aliquid impendatur temporis in examine conscientiæ.
-

CAPUT IV.

DE CONFESIONE SACRAMENTALI.

- LXXXVI. Secundum antiquas Definitiones, omnes personæ Ordinis confiteri debent semel in hebdomada, nisi aliter a Confessario statuatur.
- LXXXVII. Superiores in singulis Domibus deputent duos, tres aut plures confessarios doctos, prudentes et caritate præditos, quibus etiam reservatorum absolutio committatur, si id expedire Superiores ipsi judicaverint.
- LXXXVIII. Non liceat Superioribus confessiones subditorum audire, nisi quando peccatum aliquod reservatum admiserint, aut ipsimet subditi sponte id petierint, ad formam Decreti Clementis VIII 26 Maii 1593.
-

CAPUT V.

DE SACRA COMMUNIONE.

- LXXXIX. Monachi Sacra Eucharistia reficiantur diebus Dominicis, in omnibus festis Sermonis ac duarum Missarum, et quotiescumque Indulgentia plenaria in Ordine lucratur. De cætero, omnes a Confessario directionem accipiant circa frequentem Communionem.
- XC. Confessarii poterunt permittere Communionem frequentiore, aut etiam quotidianam, his qui puritate mentis enituerint et fervore spiritus ita incaluerint, ut illa digni censeantur.
- XCI. Qui licentiam a Confessario obtinuerit frequentioris ac etiam quotidianæ Communionis, de hoc certiore reddere Superiorem teneatur.

CAPUT VI.

DE LECTIONE SPIRITUALI.

- XCII. Expleto Opere Dei, cui nihil præponendum est, horis quibus non laborant, vacare debent monachi orationi aut lectioni.
- XCIII. In claustro legant omnes, aut in alio loco a Superiore designato.
- XCIV. Omnibus suggerantur ab Abbate necessarij libri, vera doctrina referti. Qui Abbas invigilet ne tempus terant monachi legendo ephemerides librosve inutiles.
-

CAPUT VII.

DE TACITURNITATE.

- XCV. Regularis disciplinæ observantiam nihil magis fovet quam religiosus silentii cultus; ideo nullum colloquium nobis permittitur, nequidem recreationis gratia.
- XCVI. Monachis rara loquendi concedatur licentia. Cum sibi obviant, invicem salutent cum silentio.
- XCVII. Cum extraneis personis, quæcumque illæ sint, nullo modo conversentur nec loquantur, absque proprii Superioris venia.
- XCVIII. Epistolæ nec aperiuntur neque transmittantur sine Prælatorum licentia, exceptis iis ad hanc S. Congregationem et ad Superiores Generales directis.
-

CAPUT VIII.

DE OPERE MANUUM QUOTIDIANO.

- XCIX. Monachis nostri Ordinis debet provenire victus de labore manuum, de cultu terrarum et de nutrimento pecorum.

-
- C. Eleemosynas ostiatim quæritare nequimus. Si forte collectæ fiant, colligantur a sæcularibus ab Episcopis delectis, vel saltem ipsis benevisis, exclusis monachis.
- CI. Artifices si sunt in monasterio, cum omni humilitate faciant ipsas artes, si tamen jusserit Abbas. Sed si agatur de negociatione artificiali, nulli liceat eam exercere absque consensu Conventualis et Generalis Capituli.
- CII. Labor manuum quotidianus non minus quam tres horas perdurabit, et ultra sex non protrahatur.
-

CAPUT IX.

DE STUDIIS.

- CIII. Nullus ad majores Ordines promoveatur, nisi prius sacris disciplinis serio operam dederit, et in examine coram Abbate idoneus fuerit repertus.
- CIV. Scholastici nullum officium studia impediens exercere debent. Præter tempus lectioni omnibus assignatum, concedatur eis dimidium laboris spatium ut prælectionibus intersint et studio incumbant.
- CV. Nonnulli, ex omnibus Ordinis partibus, pietate ingenioque præstantiores, a singulis Abbatibus proponendi et selegendi ab Abbate Generali cum Definitoribus, Romæ conficiant sacrorum studiorum cursum altiorem præ communi omnibus Ordinis Clericis.
- CVI. Hi studiosi in Domo Generalitia teneantur tali regula quæ cum studiorum ratione apte cohæreat. In spiritu excolantur a pio idoneoque religioso, qui idem potest esse e Definitoribus.
- CVII. Superiores invigilent ut numquam sacerdotes Theologiæ et Scripturæ Sacræ studia omnino prætermittant, sed « labia eorum custodiant scientiam et lex possit requiri ex ore ipsorum. »

- CVIII. Ad minus semel in mense, collationes aut disputationes Theologicæ habeantur, et etiam lectiones Sacræ Scripturæ, ad mentem Sacrosancti Tridentini Concilii.
-

CAPUT X.

DE ABSTINENTIIS.

- CIX. A carnibus omnes abstineant, præter omnino debiles et ægrotos, quorum imbecillitas ab Abbate consideranda est.
- CX. Oleum et butyrum ad condimentum cibi communis permittuntur.
- CXI. Omnibus diebus quibus urget præceptum ecclesiastici jejunii, in toto Adventu, excepta prima Dominica, in secunda et tertia feria ante caput Jejunii, et omni sexta feria extra tempus Pascale, Quadragesimali tantum utimur cibo.
- CXII. Tempore Quadragesimali, in feria sexta primæ, secundæ et tertiæ hebdomadæ, unicum pulmentum cum potu consueto apponitur. In feria sexta quartæ, quintæ et sextæ hebdomadæ, pane et aqua ad prandium contenti sumus.
-

CAPUT XI.

QUIBUS HORIS OPORTEAT REIFICERE FRATRES.

- CXIII. Jejunia prout a Sancto Benedicto instituta et apud ejus coævos in usu fuere, cum nostris temporibus vires multorum superare comperitum sit, ad normam hodie in Ecclesia pro Christifidelibus admissam accommodantur ut, docente eodem divo Legislatore, « et fortes sint qui cupiant, et infirmi non refugiant. »
- CXIV. In Quadragesima et omnibus diebus Jejunii ecclesiastici, prandium sumitur ad meridiem, et collatiuncula sero indulgetur.

-
- CXV. Quoties a Regula jejunium indicitur, id est ab Idibus Septembris usque ad caput Quadragesimæ, et, in æstate, omni quarta et sexta feria, hora undecima cum dimidia reficiant Fratres, et serotinam habeant collationem.
- CXVI. Diebus quibus non jejunatur a Sancto Pascha usque ad Idus Septembris, Dominicis per totum annum et omnibus festis Sermonis aut feriatis extra Quadragesimam, omnes Monachi mane accipiant mixtum, hora undecima prandeant, et ad seram cœnent.
-

CAPUT XII.

DE MENSURA CIBORUM.

- CXVII. Omnes in communi mensa, nisi infirmitatis causa impediti, vescantur.
- CXVIII. Singulis anni diebus cuique apponantur in prandio duo pulmentaria cocta. Poterunt etiam addi poma vel aliud simile, non tamen in diebus jejunii ecclesiastici, nec in feria sexta, nisi tempore paschali.
- CXIX. Ad cœnam dentur tantum duo fercula, quorum unum poterit esse coctum.
- CXX. Cuique præbeatur sufficiens quantitas panis, et pro potu ministretur vinum, vel sicera aut cerevisia, secundum consuetudinem loci. Servetur tamen mensura.
- CXXI. In diebus jejunii, sive ecclesiastici, sive Ordinis, dentur ad collationem sex unciaë panis, cum pomis, aut acetariis, aut aliis similibus, et potus sicut ad prandium.
-

CAPUT XIII.

DE SOMNO.

- CXXII. Omnes, tam Abbas quam Fratres, in communi

dormitorio recumbant, illis tantum exceptis, quos infirmitatis causa vel ratione officiorum suorum excusari oportet, juxta Abbatis judicium.

- CXXIII. In dormitorio singuli habeant, ob majorem modestiam et vitæ honestatem, loculum separatum nec omnino ex anteriori parte oclusum.
- CXXIV. Lectus sit saccus stramine repletus et panno quodam coopertus, qui possit amoveri et lavari. Tegumenta vero lanæ juxta necessitatem distribuantur.
- CXXV. Omnes secundum Regulam vestiti dormiant, nisi ob infirmitatem aut aliam rationabilem causam super hoc ab Abbate quis dispensatus fuerit.
- CXXVI. Per totum annum surgant hora secunda, exceptis Dominicis diebus et Festis solemnioribus in quibus temperius inchoantur Vigiliæ. Decumbant hora septima pomeridiana in hyeme; in æstate autem hora octava, et post prandium meridianas habeant.
-

CAPUT XIV.

DE HABITU REGULARI.

- CXXVII. Vestimenta apparentia monachorum Ordinis nostri sunt tunica et scapulare cingulo ex corio religata, et cuculla cum caputio adhærenti.
- CXXVIII. Indumenta omnia lanæ sint et alba, præter scapulare quod erit nigrum. Curet Abbas ut conficiantur juxta exemplar a Capitulo Generali approbatum.
- CXXIX. Calceis utimur secundum consuetudinem locorum.
- CXXX. Omnium monachorum caput singulis mensibus radatur, relicto tantum eo capillorum circulo quem coronam monasticam vocant.

CAPUT XV.

DE INFIRMIS FRATRIBUS.

- CXXXI. Quodlibet monasterium commune valetudinarium habeat, in quo sint cellæ omnino separatæ pro curandis commode infirmis. Præsertim sit in eo Oratorium ut Missam audire et Sacrosanctam Eucharistiam suscipere queant ægroti.
- CXXXII. In valetudinario omnia semper munda et nitida sint, et nihil desit ex supellectili et utensilibus quæ conducunt ad infirmorum commoditates necessitatesque.
- CXXXIII. Carnium esus infirmis omninoque debilibus pro reparatione concedatur. Nunquam tamen carnes apponere liceat in refectorio monachorum, sed tantum in valetudinario.
- CXXXIV. Lectum habeant stramineum infirmi sicut et sani, sed leniorem. In casu necessitatis tantum, concedi potest culcita lana repleta.
- CXXXV. Ipsis infirmis assignetur Infirmarius qui illis inserviens, Deum timeat. Sit exercitatus et prudens ut, quod medicus jusserit recte percipiat ac prudenter exequatur.
- CXXXVI. Abbas frequenter infirmos visitet, et curet ne aliquam negligentiam patiantur. Ingravescente morbo, summopere invigilet ut eis Sacramenta administrentur, et assistentia sacerdotis habeatur, ad formam Ritualis Romani.

CAPUT XVI.

DE CLAUSURA.

- CXXXVII. Clausura perpetuo ac diligenter servetur. Nulli ergo liceat septis monasterii absque licentia egredi, nequidem ad Superiorem Majorem invisendum.
- CXXXVIII. Prohibetur omnibus ac singulis religiosis, cu-


juscumque sint dignitatis, ne fœminas quas-
cumque et pro qualicumque causa in eccle-
siis nostris, in locis regularibus, seu intra sep-
ta monasterii admittant vel introducant.

- CXXXIX. Cum aliqua ecclesia Ordinis noviter dedicatur,
per novem dies fœminæ permittuntur intrare,
tam in ecclesia quàm in locis regularibus, sed
intra septa monasterii minime pernoctare.
-

CAPUT XVII.

DE FRATRIBUS IN VIA DIRECTIS.

- CXL. Nullus iter suscipere queat, nisi pro necessitate
Domus, aut ob gravissimam causam, et sem-
per cum licentia.
- CXLI. Dirigendus in via accipiat ab Abbate suo litteras
commendatitias, in quibus determinetur locus
ad quem mittitur, et præfigatur tempus ac
terminus itineris et reversionis.
- CXLII. In itineribus faciendis, omnes, juxta SS. Ponti-
ficum Decreta, vestiantur habitu regulari, nisi
Superiori visum fuerit, ob justam causam, ali-
ter expedire. Super habitum induant pallium
nigrum, et caput galero cooperiant.
- CXLIII. In via nemo præsumat carnes manducare, nisi
de licentia proprii Superioris, aut in casu ne-
cessitatis. Navigantibus tamen id conceditur,
juxta traditiones Ordinis.



PARS TERTIA.

DE INGRESSU IN ORDINE.

CAPUT I.

DE CANDIDATORUM ADMISSIONE.

- CXLIV. In admittendis novitiis summa diligentia exhibeatur, et nonnisi qui bonis moribus, vita, fama, conditione et educatione cedere possint ad Ordinis utilitatem et honorem, recipiantur.
- CXLV. Illegitimi, et qui censura, irregularitate, aut alio canonico impedimento innodati, ære alieno gravati vel reddendæ alicujus administrationis rationi obnoxii reperiuntur, excludendi sunt.
- CXLVI. Superiores præterea diligenter exquirant quo spiritu, qua mente ac voluntate, id regularis vitæ genus elegerint, quem sibi finem proposuerint; num zelo melioris frugis ac perfectioris vitæ, et ut Deo liberius famulari possint, an potius levitate vel humano aliquo affectu aut inordinato animi, ducantur.
- CXLVII. Antequam in novitios adsciscantur, postulantes per aliquot tempus in suo habitu probentur.
- CXLVIII. Clerici in Sacris constituti non admittantur ad habitum absque testimonialibus litteris, tum Ordinarii originis, tum etiam Ordinarii loci in quo postulans, post expletum decimum quintum annum ætatis suæ, ultra annum moratus fuerit.
- CXLIX. Si vero agatur de Clericis in Minoribus, requirantur quoque testimoniales litteræ Ordinariorum locorum in quibus ultra tres menses morati fuerint.

-
- CL. Novitii choristæ ante quintum decimum ætatis annum non recipiantur.
-

CAPUT II.

DE NOVITIATU.

- CLI. Nulli Abbati liceat novitium recipere aut benedicere extra monasterium Ordinis. Nec potest aliquis qui non sit de Ordine habitum nostrum alicui dare.
- CLII. Vestimenta novitiorum sunt tunica, scapulare, cingulum et cappa : omnia lanea sint et alba.
- CLIII. Novitii eisdem cibis vescantur ac monachi, iisdemque horis laborent, quiescant, legant et dormiant. Jejunia Ordinis non servant, nisi vigesimum primum ætatis annum expleverint.
- CLIV. In ecclesia, in refectorio et ubique, ordine suo sicut monachi, conventum teneant.
- CLV. Non liceat eis una cum professis, nisi in choro, in ecclesia tempore Officiorum, in processionibus, in capitulo, aut in cœnaculo causa refectiois, commorari.
- CLVI. Novitiis nulla committatur administratio. A studiis cessabunt, excepto quod Scripturæ Sacræ lectiones audient.
- CLVII. Iphis instituendis deputetur Magister qui sit sacerdotali Ordini initiatus, et quantum per Superiorum diligentiam et vires fieri poterit, vitæ antea actæ exemplo præstantior ; orationi præterea et mortificationis operibus addictus, prudentia caritateque refertus.
- CLVIII. Sit etiam pro novitiis locus deputatus, ut lectionibus vacent et instructiones Magistri audiant.

CAPUT III.

DE PROFESSIONE SIMPLICI.

- CLIX. Novitii, post biennium tirocinii, vota simplicia emittant. Hæc vota perpetua erunt ex parte voventis, et eorum dispensatio reservata est Romano Pontifici cui professi, gravibus urgentibus causis, preces porrigere poterunt.
- CLX. Eadem simplicia vota solvi etiam possunt ex parte Ordinis in actu dimissionis professorum. Hæc facultas dimittendi professos votorum simplicium spectat ad Abbatem Generalem cum Definitoribus.
- CLXI. Ad decernendam dimissionem, neque processus, neque iudicii forma requiritur, sed ad eam procedi potest, sola facti veritate inspecta.
- CLXII. Nemo ex causis infirmitatis post professionem votorum simplicium superventæ, dimitti poterit.
- CLXIII. Professi votorum simplicium dominium radicale suorum bonorum retinebunt, sed eis omnino interdicta est eorum administratio et reddituum erogatio atque usus. Debent propterea ante professionem cedere, pro tempore quo in eadem votorum simplicium professione permanserint, administrationem, usumfructum et usum quibus eis placuerit, ac etiam suo monasterio, si ita pro eorum libitu existimaverint.
- CLXIV. Suffragium habent in electione Abbatis et in omnibus actis Capitularibus conventus, si sint in Sacris constituti, excepto in casu de admittendo ad professionem solemnem.
- CLXV. Regulam observare debent et choro interesse ut solemniter professi, non tenentur tamen ad privatam recitationem Divini Officii.

CAPUT IV.

DE PROFESSIONE SOLEMNI.

- CLXVI. Monachi, post triennium votorum simplicium, vota solemnia emittere poterunt. Attamen hæc professio solemnitas ex justis et rationabilibus causis a Superiore differri poterit, non tamen ultra quinquennium postquam emissa fuerint vota simplicia.
- CLXVII. Religiosus, intra duos menses proximos ante professionem votorum solemnium, dominio etiam radicali omnium bonorum suorum renuntiare debet. Hæc renuntiatio tantum post professionem editam vim atque exitum habet.
- CLXVIII. Pro admittendo professo ad vota solemnia iterum requiruntur conventus suffragia secreta, sed nonnisi solemniter professi et in Sacris constituti, habent jus ferendi suffragium quod, in hoc casu, est mere consultativum.
-

CAPUT V.

DE NOVA STABILITATE.

- CLXIX. Nulli sine causa et magna necessitate stabilitatem suam mutare licet, nec nisi obtento consensu proprii Abbatis atque Congregationis cui associandus est, idque postquam per annum integrum in monasterio pro quo postulat conversatus fuerit in ultimo ordine monachorum.
- CLXX. Consensus communitatis requiratur per suffragia secreta. Omnes monachi, etiam simpliciter professi, dummodo sint in Sacris constituti, jus habent suffragium deliberativum ferendi, quamvis candidatus jam vota solemnia emiserit.
-

CAPUT VI.

DE RELIGIOSIS EX ALIO ORDINE VENIENTIBUS.

- CLXXI. Religiosus ex alio Ordine apud nos adscisci

cupiens, non admittatur, nisi de Apostolicæ Sedis licentia.

- CLXXII. Is, per biennium in tirocinio maneat, et in omnibus se gerat sicut cæteri novitii quamvis vota solemnia in suo Ordine jam emiserit.
-

CAPUT VII.

DE FRATRIBUS CONVERSIS.

- CLXXIII. Fratres Conversos seu Laicos in Ordine suscipimus tanquam Coadjutores qui sub cura nostra sunt, participesque fiunt nostrorum tam spiritualium quam temporalium bonorum, et sicut nosmetipsos tractamus, « excepto monachatu » scilicet voce activa et passiva non gaudent.
- CLXXIV. Qui vitam conversorum amplecti postulant, non minores viginti annis recipiantur. Post sufficientem probationem idonei reperti, habitu religioso vestiantur, et per duos annos integros novitii maneant.
- CLXXV. Expleto novitiatus tempore, vota simplicia emittent, et, post triennium, ad vota solemnia nuncupanda vocari poterunt, sicut et monachi.
- CLXXVI. Pro conversorum professione suffragia conventus non requiruntur, sed Superior agat prout in Domino opportune judicaverit.
- CLXXVII. Vestimenta conversorum sunt tunica, scapulare, cingulum ex corio et cappa. Lanae sint et fuscii coloris. Novitii cappam non deferant, sed, ejus loco, caputium scapulas tantum et et pectus cooperiens.
- CLXXVIII. Qui habitum conversi in Ordine suscepit, nunquam ad gradum choristarum transferri poterit.
- CLXXIX. Conversi Missæ Conventuali et Vesperis dun-

taxat diebus festis feriatis assistant, ne a manuum labore retrahantur. Aliis diebus, oratione mentali peracta et audita Missa privata, opera quæ eis fuerint demandata sedulo exequantur.

- CLXXX. Pro divinis Officiis dicant preces quæ illis in Rituali Cisterciensi assignantur, quin ex hoc iste liber Ritualis a S. Sede approbatus censeatur.
- CLXXXI. Habeant Conversi plures sacerdotes monachos, ab Abbate deputatos, qui eorum confessiones audiant, et unum Magistrum Conversorum vocatum, qui eos doctrina christiana et Regula instruat.
- CLXXXII. Conversi reficiuntur in mensa communi, sicut et monachi, sed jejunia non servant, nisi quæ sunt ab Ecclesia præscripta.
- CLXXXIII. Horis quibus non laborant, orationi aut piis lectionibus incumbant. Non legant tamen in claustro cum monachis, sed in cella separata.
-

CAPUT VIII.

SI DEBEANT ITERUM RECIPI FRATRES EXEUNTES DE MONASTERIO.

- CLXXXIV. Fugitivi et apostatæ Ordinis qui, sive habitu dimisso, sive retento, monasterium deseruerint, excommunicationem a jure, ipso facto incurrunt, et ab omnibus evitandi sunt.
- CLXXXV. Si forte fugitivus vel apostata in loca Ordinis venerit, recipiatur tantum in porta, donec Superior de eo requisierit qua de causa et quibus conditionibus veniat. Quod si Superior intellexerit fugitivum ad monasterium suum nolle redire, non eum sinat amplius una nocte illic manere.
- CLXXXVI. Si quis monachus vel conversus in gravi ac pernicioso crimine notorie incorrigibilis evaserit, Superior ejus causam ad Abbatem Ge-

neralem deferat qui poterit reum ex Ordine ejicere, servatis de jure servandis.

- CLXXXVII. Fugitivus vel apostata, ad monasterium revertens, satisfaciat juxta usum Ordinis. Ejectus autem non recipiatur sine Sedis Apostolicæ dispensatione.
- CLXXXVIII. Monachus qui Indultum sæcularizationis obtinuit, ad claustra nostra redire petens, non poterit admitti sine consensu Abbatis Generalis. Non tenetur professionem et novitiatum iterare; probetur tamen ad arbitrium Superioris.
- CLXXXIX. Ordinem in conventu teneat quem ei reversionis tempus præstat, non primæ initiationis.
- CXC. Si quis forte post vota simplicia dimissus iterum nostro Ordini nomen dare postulaverit, non recipiatur sine Abbatis Generalis venia.
- CXCI. Is novitiatum et professionem iterare debet, et in omnibus agere sicut cæteri postulantes, excepto quod habitum religiosum absque ulla cæremonia induit.



DECRETUM.

SSmus D. N. LEO PP. XIII. in Audientia habita a Me Cardinali Præfecto S. Congregationis Emorum ac Rmorum. S. R. E. Cardinalium negotiis et consultationibus Episcoporum et Regularium præpositæ, die 13 Augusti 1894, superscriptas Constitutiones, prout in hoc exemplari continentur, cujus autographum in Archivio supramemoratae S. Congregationis asservatur, benigne approbare et confirmare dignatus est, veluti præsentis Decreti tenore, Constitutiones ipsæ approbantur et confirmantur, contrariis quibuscumque minime obstantibus.

Datum Romæ ex Secretaria ejusdem S. Congregationis Episcoporum et Regularium die 25 Augusti 1894.

J. Card. Verga Præf^s.

Locus † Sigilli.

A. Trombetta Pro-Secretarius.

INDEX RERUM.

DECLARATIO PRÆVIA.

PARS PRIMA.

DE REGIMINE ORDINIS.

Caput I.	De Capitulo Generali.	Fol.	3
Caput II.	De Abbate Generali.	»	5
Caput III.	De Definitoribus	»	6
Caput IV.	De Procuratore Generali.	»	7
Caput V.	De Patribus Immediatis	»	8
Caput VI.	De Abbate vel Priore Titulari.	»	8
Caput VII.	De Visitatione regulari.	»	10
Caput VIII.	De Electionibus Abbatum	»	10
Caput IX.	De novi Monasterii Fundatione.	»	11

PARS SECUNDA.

DE OBSERVANTIIS.

Caput I.	De uniformi Observantia.	Fol.	13
Caput II.	De divinis Officiis.	»	13
Caput III.	De Oratione mentali	»	14
Caput IV.	De Confessione sacramentali	»	15
Caput V.	De sacra Communione.	»	15
Caput VI.	De Lectione spirituali	»	16
Caput VII.	De Taciturnitate	»	16
Caput VIII.	De Opere manuum quotidiano	»	16
Caput IX.	De Studiis	»	17
Caput X.	De Abstantiis	»	18
Caput XI.	Quibus horis oporteat reficere Fratres	»	18
Caput XII.	De mensura Ciborum	»	19
Caput XIII.	De Somno	»	19
Caput XIV.	De Habitu regulari	»	20
Caput XV.	De infirmis Fratribus.	»	21
Caput XVI.	De Clausura	»	21
Caput XVII.	De Fratribus in via directis	»	22

PARS TERTIA.

DE INGRESSU IN ORDINE.

Caput	I.	De Candidatorum admissione.	Fol.	23
Caput	II.	De Novitiatu.	»	24
Caput	III.	De Professione simplici	»	25
Caput	IV.	De Professione solemnī	»	26
Caput	V.	De nova Stabilitate	»	26
Caput	VI.	De Religiosis ex alio Ordine venientibus	»	26
Caput	VII.	De Fratribus Conversis.	»	27
Caput	VIII.	Si debeant iterum recipi Fratres exeuntes de monasterio	»	28



